

國學基本叢書
續行水金鑑

六



書叢本基學國

鑑金水行續

(六)

修纂等序世黎

行發館書印務商

續行水金鑑總目

圖一卷

河水圖六 附沁水圖一

淮水圖二

運河圖八 附圖三

永定河圖

江水圖

書一百五十六卷

河水 第一卷至第五十卷

淮水 第五十一卷至第六十四卷

運河水 第六十五卷至第一百三十二卷

永定河水 第一百三十三卷至第一百四十五卷

江水 第一百四十六卷至第一百五十六卷

續行水金鑑卷第七十九

運河水章 續七

乾隆二年二月初七日工部議江蘇巡撫邵基奏興行水利江甘徒陽等處運河每年分別動支藩運二庫公項挑挖外其餘各屬河道凡關糧艘往來及江河湖海要區專資通洩之處俱於河藩二庫收存匣費項下動帑委員每年估浚其支河汊港仍聽地方官每歲查明於農隙照例業戶幫給飯食佃戶出力順從民願俾及時挑挖深通修築圩岸報明存案運鹽河道亦如舊例聽其疏浚等語應如所奏令該撫將各屬運河凡關糧艘往來及江河湖海要區遇有淤淺責令水利各員應修應浚處所據實估報動項修浚所需銀兩准於藩運二庫公項下并河庫及藩庫收存匣費銀內動支俱令冊報戶部並臣部查核其支河汊港向係業戶幫給飯食佃戶出力疏浚者令該撫每年農隙諭令道府濱河各官相度勸導順從民願疏浚修築務使田畝灌溉有資商鹽船隻無阻如地方官不能實力奉行致胥役人等科派擾累該撫卽行指參奉旨依議速行南河成案

六月十四日上諭總理事務王大臣今年五月間山東雨少運河水淺以致糧艘不能銜尾而進沿途挖淺起剝甚費經營而臨清以北更多阻滯朕細加訪察臨清以北全賴衛水合汶以濟運而衛水發源於河南衛輝府至臨清五百餘里沿河居民往往私洩以爲灌溉之用每致運河水淺糧艘難行經前任河臣靳輔題定每年於五月初一日盡堵渠口使衛水全歸運河以濟漕運此歷年遵行之成法也今因日

久法弛。衛水來源小民不無偷放之弊。遂致運河水勢長落不常。重運難於北上。目前正當緊要之時。所當稽查嚴禁者。著北直河南督撫速行辦理。務使衛水涓滴不致旁洩。糧運過行無阻。若地方有司有視為故套者。即行查參。純皇帝聖訓。

七月二十九日都察院左副都御史陳世倌奏。臣由直隸前往山東曲阜。凡事關國計民生者。沿途體訪。謹陳十事。伏祈聖明俯賜採擇。一河南祥符金龍口。乃黃河屢次衝決之工。一有疎虞。直趨運河。數百里田廬被害。聞年久不修。所有椿埽實多朽爛。現雖未有衝決之患。然事防未然。似宜急為鑲修。伏請勅下河南撫臣會同河臣親勘。如果應修。作速題估興工。以免衝運道而害民田。勿惜費因循。致貽後累。一山東運道自濟寧至臨清數百里。全資汶水接濟。汶水入運。全恃戴村壩遏之。南流出分水龍王廟。三分南流七分北流。其盈溢之水由壩面洩入鹽河歸海。此全運之關鍵也。明潘季馴建砌石壩入地四尺出水三尺。但期蓄水濟運。並無玲瓏之制。原案昭然。康熙四十年後。土人忽有玲瓏之名。實屬傳會不經。雍正四年何國宗等同臣會勘。因年久傾圮。修築石壩百餘丈。而壩頂較舊加高一尺者。因河底淤高。若照舊三尺則洩水過多。不足濟運故也。乃督臣田文鏡因與何國宗等議小丹河不合挾嫌。八年大水。遂參何國宗改毀舊制。致洩損民田。請拆去新壩。改復玲瓏舊制。河臣朱藻誠恐改造玲瓏式樣。通流不足濟運。乃拆石壩五十五丈。改砌涵洞五十有六。用閘板啓閉。似可宣洩。但今石洞已被沙淤。閘板不能啓閉。其通流者日令河兵拾石填塞。又於石壩東留有土隄。秋冬堵塞以防汶水外洩。春夏聽其衝刷。名為春秋壩。是仍不使通沙於玲瓏之義何居。徒使壩底虛鬆。儻汶水驟漲。恐非蓋面石塊及數鐵錠所能鉗。

歷設有疎虞。則全汝盡注鹽河。更無涓滴濟運。現今皇上特遣侍郎趙殿最等會勘運道。請并交查明。潘季馴修建石壩時。有無玲瓏原制。現在壩身果否鞏固。應否仍照原壩丈尺。改建石壩。其淤沙每年作何挑浚。堆貯何處。會同撫河諸臣詳議定制。庶運道長保無虞矣。一直隸景州。環城皆水。低下之田。十居其四。每遇水發。輒被淖浸。蓋因德州故城縣水自西南而來。滙於州東北名千頃窪者。與東光南皮接壤。流入交河縣之夾河。歷青縣入運河。達於海。年久耕種納賦。東光南皮之民。堅築窪口。不令開放。又州南惠民渠。向滙諸水入千頃窪者。今故道湮廢。致水四出。民間被害。查康熙四十二年。雍正七年。及十二年。三次開放。歷有成案。今應將窪口開放。庶積水可涸。冬春不悞種麥。但下流不通。則放下之水。東光南皮不免鄰國爲壑。請勅下督臣委員。將千頃窪至交河以下故道。有無深通。歸宿何處。現在可否疏浚。俾令通流。則不特景州水患可除。卽東光南皮亦均沾樂利矣。一山東德州。城臨運河之上。運河水大。直射城之振河閣老虎倉等處。年年被衝。雍正十二年。撫臣岳濬奏。請於城西北十二里哨馬營。挑支河一道。築滾壩一座。分運河之水。會鉤盤之水。由樂陵海豐等縣入海。但新挑支河。下流未能寬深。宣洩未暢。而支河之水。反從三涵洞逆流倒灌。致德州東北兩門積水城外村莊淹浸。凡支河經處。亦因河窄。不能容受。多致漲溢。請一并會勘測量。如果河身淺窄。重加疏浚。務使一律深廣。俾通行入海。庶足保運而衛民田矣。一山東恩縣。地勢窪下。西北各鄉。逼近運河。凡夏津武城等處。水發滙聚該縣之西北鄉。現今田莊被淹。查康熙四十二年。四女寺地方。建減水閘。以洩內地積水。流入運河。雍正四年。何國宗等會勘。將減水閘改爲滾水輓壩。東挑支河。引入舊黃河故道。十一年大水。輒工坍塌。支河南岸衝開十餘丈。朱藻

勸節省銀用柴搶修。經今三年。但柴工年久易蟄。請勅下河臣詳勘。或仍改輒工。並將支河挑深。使水不泛溢。則恩邑民田得免被淹。而運河漲水亦得分洩矣。一山東兗州東昌之水。現有運河鹽河通流。又臣曾請疏馬頰。徒駭二河。尙能宣洩。惟濟南青州河道不一。而大概會歸小清河入海。其水自章邱鄒平長山新城高苑博興至樂安入海。凡許山泊沙河白條河清水泊麻大泊孝婦河鄭黃溝烏河諸水。無一不入其中。縣亘六百餘里。湮廢年久。每夏月水發。衝沒民田。如萬家口決。則與許山泊合。而章邱鄒平受困。陶唐口決。則與清沙泊合。而新城受困。軍張口決。則高苑受困。其餘若博興預備河高苑支脈溝新城澇溜河。或應濬河。或應幫隄。年來地方官雖講求修濬。但下游海口未通。則上流泛漲。仍然不免致水漲居民爭利。械鬪結訟不休。查海口之在樂安者。名寬闊稍約長四十餘里。不無淤塞。又聞小清河與鹽河相距不過數十里。臣以爲小清河故道不能盡復。而下流海口不可不通。請勅下撫臣專委道員詳勘。或濬樂安海口。或引入鹽河會歸入海。因勢利導。則七邑民田實蒙粒食之休矣。今按以下四條無關河工不載。總理事務王大臣等議覆陳世倌奏。稱祥符金龍口最爲險要。請確勘估修。查金龍口本屬險要。今應否估修。請勅交河南巡撫會同總河查議。又稱戴村壩關繫運道。請交趙殿最等查明。現在壩身果否鞏固。應否仍建石壩。撫河諸臣詳議。請勅交侍郎趙殿最等一併查議。又稱景州東北千頃窪故道湮廢。水無所歸。民間被害。請委員查勘。千頃窪至交河以下故道可否疏浚。俾令通流。查千頃窪離城東北僅三十里。初係開渠引水入窪。俾毋汎濫爲民利。今既入水故道湮廢。而利窪之利者。又築塞窪口。則上流下流均受其病。請勅交直隸總督速行查辦。又稱哨馬營新挑支河。下流未能寬深暢洩。支河逆流倒灌。

城外村莊淹沒。凡支河經處。亦因河窄難容。漲溢爲患。請勅交趙殿最等一幷查議。又稱恩縣西北逼近運河。現今田莊被淹。四女寺地方。原建減水閘。嗣改滾水壩。東挑支河。復用柴搶修。不足捍禦。應令河臣詳勘。或改用輓工。幷將支河挑深。使水不泛溢。請勅交趙殿最等一幷查議。又稱濟南青州河道。會歸小清河入海。下流海口。不可不通。請勅撫臣。專委道員詳勘。查三府河道。既會歸小清河入海。則下流自宜通暢。請勅交山東撫臣查議具奏。奉旨依議。運河道冊。

九月二十五日。總理事務王大臣等會議得。戶部左侍郎趙殿最等條奏。一宜修築各湖圈隄。以資關束。蜀山馬踏馬場。獨山微山五湖。爲潑水濟運要區。除獨山微山二湖。周圍地高。向無圈隄。毋庸議築外。其蜀山馬踏馬場。從前修築圈隄。年久不無殘缺卑矮。且有未經全築者。本欲使近處坡水洩入湖內。第無隄壩關欄。如坡水高於湖。固可宣之使入。若湖水高於地。亦不能禁之不出。坡水歸湖。既有益漕運。且免淹田。若湖水溢出。則不免淹田洩水。請將各湖圈隄。凡有殘缺卑矮。悉行修補。其原未全築者。悉行補築。仍酌建石閘涵洞。值坡水驟注之時。卽開放入湖。如坡水已過。卽下板嚴閉。不使溢出。於漕運民田。更收實益。請飭河道勘報題請興修等語。我世宗憲皇帝。念切民依。特遣何國宗等徧勘據奏。稱蜀山馬踏馬場等湖。圈隄應加高培厚。並建重板石閘。則啓閉易而蓄洩以時。雍正四年正月。經九卿議准。令戶部侍郎趙殿最等。旣稱蜀山馬踏馬場等湖。圈隄年久殘缺卑矮。請全行修築。並酌建石閘涵洞。應令河東總河將應建應築處所。遵循舊址。詳估造冊題修。一宜疏泉河。以通泉流。查諸泉距湖遠近不等。必由泉河始達於湖。其達蜀山馬踏者。曰滙河汶河。達馬場獨山者。曰泗河府河。皆水泉歸湖咽喉也。明常居敬

云河廣沙深。屈曲之流。不足以潤渴吻。必擇其沙淤者。浚爲河泓。深五尺。闊一尺。則水得所歸。趨壑亦易。請每年令州縣官於水落後。卽將淤淺段落丈尺。逐細查報。河撫諸臣丈勘。令該州縣雇夫挑浚。所用夫工銀兩。隨運河大小挑工程彙題請銷。每歲需用銀兩。臨時確估。而泉河深通。泉流暢達。不勞民力。而運河可資灌輸等語。查雍正四年九月。何國宗奏稱。有泉州縣道廳各員不能徧察。請設管泉通判。專司泉政。亦經九卿議准。今趙殿最等。請每年令州縣官於十月水落後。將淤淺段落丈尺查明開報。僱夫挑浚。該省大員原應督率辦理之事。應令總河巡撫嗣後每年於十月後。嚴飭管泉通判協同管泉各員查勘。凡有淤處。據實開報。委員勘實。卽募夫挑浚。其所用夫工銀兩。在該省大小挑工程案內彙題請銷。務使泉流通暢。以資灌輸。如有浮估冒銷。卽照例查參。再查河深五尺。則上口闊須三尺。底闊一尺。乃可長久。若上下皆闊一尺。則泉在下漱。雨從上淋。不逾時而淤塞矣。請嗣後凡挑泉河深五尺者。須上口闊三尺。底闊一尺。以垂永久。一請定期築壩挑河。以蓄水勢。連河南旺濟寧臨清塘河。例係每年一小挑。間年一大挑。先於河口築壩斷流。將河水放入各湖。以便挑挖。勒限完竣。一律深通。迨次年冰泮雨集。山泉湧發之時。開壩放水入河。以浮送糧艘。考前明定期。每年十月十五日煞壩。次年二月初一日開壩。相沿日久。竟有遲至十一月二十日後始行煞壩者。天氣日寒。冰凌積厚。夫役寒慄。冰勢凝結成塊。拋棄日多。不無消耗水利。况壩一日不煞。則河水多洩。一日臣等酌議。十一月二十日以後築壩。似乎過遲。而十月十五日又太早。官民船隻往來不便。應定於十一月初一日煞壩。兵部頒發告示。務於十月發到張掛。其開壩日期。則以南漕船隻至臺莊閘爲準。如此則挑河蓄水。便民利漕。一舉兩得等語。查向例每年於十月

十五日築壩。次年二月初一日開壩。繼因水旱不齊。回空遲速不定。致違定限。年來河漕催儻既嚴。抵通交兌亦速。自應立定期限。使沿河地方官弁有所遵循。應如所奏。請勅諭該督撫。嚴飭押運催儻文武員弁。及沿途印河各員。於重運開行後。嚴催作速抵通。倉場亦即收兌。催儻回空。如逾期不行築壩。及糧船未至臺莊。先行開壩。即將該管各官查參。照例議處。俟命下日。知會戶部兵部並各督撫一體遵行。一禁紊亂漕規。以資宣蓄。東省運河與他省運河不同。志載南旺分水口。北高於臨清九十尺。南高於臺莊一百六十尺。高下相懸。所恃石閘四十八座。重重收束。得以節宣。各閘舊設會牌。如糧船到閘。啓板。必俟上下兩閘之板緊閉。會牌俱到。始行開閘放船。若通漕打放。下閘未閉。上閘已開。則直瀉無餘。當春夏惜水如金。所關匪細。誠恐沿河各鎮道及文武員弁。未知漕規。止期儻連。迅速勒令汛閘啓板通漕。必致走洩河水。欲速反遲。請嗣後沿閘鎮道文武員弁。催儻漕船。如遇春夏水微。務遵漕規啓閉。如上下會牌已到。而閘官尙未啓板。即暫令開閘放船。一面詳知總漕總河查參。如會牌未到。不得逼勒啓板。其會牌亦不得略有稽遲。如遇河水充足。相機啓閉。以速漕運。不得兩閘齊開。過洩水勢等語。查運河各閘。原爲收束水勢。全在啓閉得宜。會牌之設已久。經管汛閘等員。自必遵守。今趙殿最誠恐各鎮道及文武員弁。未能盡知。奏請務遵漕規啓閉。應請勅下督撫諸臣。飭令沿河鎮道文武員弁。凡重運經臨。遇春夏水微。務遵漕規。依時啓閉。毋致水勢走洩。重運淺阻。如會牌未到。催漕各員。不得逼勒啓板。會牌已到。該管閘官不得遲延。如有遲悞。即查參治罪。一請酌開何家舊壩。以資宣洩。汶河自戴村壩以下。分水口以上。有何家口舊建滾水石壩。壩外有支河二道。汶河水漲。則由石壩滾入支河北流至劉老口。石頭口歸入運。

河。雍正十一年朱藻題請將二支河口門築土壩二道堵之。不使汝水涓滴旁洩。蓋爲濟運起見。但戴村壩至分水口縣長百餘里。春夏之交。汝河受諸山之水而來。戴村壩止能洩上源之水。而水過壩下。則無路宣洩。且壩以上。河形寬至百餘丈。壩以下僅十數丈。上寬下窄。勢難容受。未免盈溢民田。查支河堵塞。後雖劉老口石頭口上下豆腐營茶棚沙淤較輕。而分水口沙淤較甚。蓋汝水至分水口南北分流。俱四五六里及十餘里。始有各斗門入南旺湖。並非由分水口即穿運入湖。途紆流遠。水過沙停。此浮沙所以不能掣入湖內。而水少沙多。淤墊更甚。今查舊壩年久坍塌。重建費繁。而新築土壩亦不宜毀。酌議於兩道士壩內各建涵洞。設立閘板。令汝上縣主簿就近管理。汝河水小則閉板。水漲則啓板。放入支河歸運。以殺水勢。如有遲誤。將該員參處。撫河諸臣將應建涵洞工料勘估詳題。動帑興修等語。查先據前河臣朱藻疏稱。汝上境內有汝河一道。上匯諸泉。西注分水口。流入運河。惟因水帶沙行。於運河西岸開建常鳴等八斗門。將沙掣入南旺湖內。俾入運清水南北分流。是以謂之分水口也。查分水口之上。汝河之西。舊有劉老口石頭口支河。分洩汝水。亦入運河。今詳細確估。必須於二支河口門建築土壩一道。臨河鑲做防風。以斷支流。尤須於壩後再築土壩一道。以爲重門保障等因。題准。今趙殿最等議於兩道士壩內各建涵洞一座。設立閘板。令汝上縣主簿就近管理。應令總河遴員將應建涵洞等工據實確估。照例冊題興修。一武城城根衝刷。當酌籌變通。查東昌武城縣城垣在運河南。其東北一隅正當迎溜頂衝。城根漸坍。水逼城下。雍正四年何國宗等議於北岸挑引河。朱藻因水分勢緩。必致沙淤。且中有河埂。一經刷平。兩河合一。水逾汪洋。恐阻漕運。議於南岸修建甌工。以護城根。該處地係流沙。根底虛鬆。每遇伏秋

汛內。汶、漳、衛、三水洶湧衝激。上實下虛。臣等見輓工業已墊陷。現經修築柴工。卽再建輓工。斷難經久。若止議挖引河。又不免如朱藻所慮。查德州振河閘護城輓工墊陷。溜逼城根。曾於雍正十一年題改新河。二百六十餘丈。將舊河築壩斷流。使水歸新河。城根得免衝刷。今武城輓工勢同一轍。或仿德州之例。於北岸另開運河。竟將舊河築壩斷流。則城垣既避急溜之衝。亦無水分勢。緩及兩河合一之處。經飭管河道等細勘。如北岸形勢便於挑河。卽確估具詳。儻形勢不便。務於該工上首相度形勢。建挑水壩。挑溜開行。以護本工。臣等意見相同。應請飭撫河諸臣。令河道勘明議題。其民居墳墓一切有礙等處。紆途開挑。應用民人田地。照例給價豁糧。土方夫價估實具題興工等語。查先據何國宗等奏。武城北運河北岸淤出沙嘴。汛水南逼城隅。請於北岸挑引河。並將沙嘴挑去。使水循北岸。則城垣可保。續據朱藻疏稱。武城運河水勢自北折而東注。城東北隅正當頂衝。每遇伏秋衛河漲發。加以洄溢。淇諸水合流洶湧。又兼地多浮沙。縱使挑浚引河。挖去淤嘴。仍不免淤塞河內。而南岸建築迎水壩。亦不足恃。應改建輓工。庶賴捍禦頂衝。題准遵行。今趙殿最等會同查勘。飭令河道細加酌量。或應挑河。或令建壩。應俟該道等勘覆。該總河仍會同東撫親臨相度。並將有礙民居墳墓。應用民人田地。一切需用土方夫價。據實會核具題。到日再議。奉硃批依議。運河道冊。

是日總理事務王大臣等會議得。趙殿最奏。德州哨馬營設有滾水壩。引入支河。以洩運河異漲。經鈎盤河。由海豐等縣入海。原以佐四女寺宣洩之不及。祇緣支河受漳衛之水。水過積淤。未能常通。茲據陳世倌奏請。並交臣等會勘測量。如有淤淺。重加疏浚。臣等查支河口壩面寬三十丈。以下漸東至曹村隄口。

僅寬十六丈。且中間舊有惠濟一橋。其下石柱挨排。一遇大水收束過密。不得充瀉。而橋僅高八尺。常致水漫沙停。本年春纔經雇挑完竣。夏又大水積淤逾甚。自壩口至曹村隄口。淤沙至二三四尺不等。正在估計。俟水退挑浚。應如所請。交撫臣確估。挑挖深通。再臣等愚見。應將惠濟橋拆去。拔出椿石。再將曹村隄口開寬八丈。連原河身十六丈。計二十四丈。以資宣洩。但此橋行人往來。請設官渡船一隻。渡人。秋冬水涸。另搭草橋。以濟往來。再曹村隄口迤南舊有陳公隄。以防鉤盤河水漲。保護民田。從前缺口甚多。已題明東省堵築。一十四處。直隸堵築二十三處。尙留九處。係民間例洩坡水。聽其留存。殊不知伏秋二汛。支河之水。直趨東北。而鉤盤之水。不能驟消。卽虞倒灌。恐沿隄村莊。易罹水患。似宜堵築。於陳公隄迤南建石閘一座。中置閘板。設立閘夫二名。以時啓閉。交德州州同專管。儻有坡水積聚。亦可借資宣洩。再支河南隄舊建涵洞三座。以洩坡水。歸入支河。因支河口門窄狹。宣洩不及。有倒漾之時。今既將曹村口隄口開寬。其原設三涵洞。應照舊存留。再於洞外圈築土壩。如遇河漲。可禦倒漾之水。若河水稍落。酌開壩口。以洩坡水。則倒漾無虞。更有請者。哨馬營支河。務使一律深通。無論直隸山東所屬。如有積淤。每年疏浚。照歲修之例。庶免工繁費大。茲查德州支河兩岸官地。每歲額收租銀一百九十九兩。原存州庫。以備疏浚。請將此項租銀。令解交司庫。每年委員查勘。淤淺多寡。以酌夫工額數。統於歲修項下開銷。似於運道民生有益。再直隸管河官等。咸稱經由直隸所屬吳橋等五縣。現在水深。東流尙無沙淤。但老黃河水勢澎湃靡定。其現有水淺四段。俟涸出。查勘果有淤塞。交直隸督河諸臣。勒查疏通。所有應行挑浚修隄建閘造船等項。需用銀兩。俟命下准行之日。交各該督撫河臣酌議。核估題請興修等語。查先據山東巡

撫岳濬等疏稱。哨馬營在衛河東岸。距州城八里。應開挖新河。東行十里。由曹村隄口放水入鉤盤河。故道歸海。應於哨馬營建滾水壩。自壩下塘口起。至鉤盤河中心止。挑河一道。兩岸各築遙隄。酌開涵洞。以洩德州城東坡水。復於哨馬營曹村隄口東西適中之盧家莊前。建橋一座。以通行旅。仍將鉤盤河老黃河疏濬暢流。其陳公隄現有殘缺。逐段修補等因。題請興修。是哨馬營支河。係佐四女寺宣洩。運河異漲。原宜疏浚深通。今趙殿最等查勘云云。查陳公隄缺口九處。既爲民間利洩坡水。今一改石閘。遇有不肖官吏司其啓閉。轉致病民。應令總河確勘。應否建閘。或仍留缺口。順從輿情。另行請旨遵行。其築壩挑河造船等事宜。應如所奏。令督撫河官將前項各工高寬深淺丈尺段落。及一切應需夫料價值。據實估題請修。且哨馬營支河。遇有淤淺。凡屬東省地界者。卽於德州支河兩岸官地。額收租銀內動用。工完報部查核。其有屬直隸交界者。令直隸總河酌議。動帑疏浚。所有吳橋等五縣。現在水淺處所。應令直隸總河等俟涸出時。確實具題。到日再議。奉硃批。依議。速行。運河道冊。

是日總理事務王大臣等會議得。趙殿最等奏。東省運河水泉閘壩。奉旨令臣等會勘。於上月十一日。由臨清州起程。查汶河所資大原小原等泉源。又查勘蜀山馬踏南旺馬場等湖。又由濟寧州至黃林莊查勘獨山南陽昭陽微山等湖。又彭口及巫山等泉源。至一切閘壩等。俱經詳勘。其臨清州迤北至德州桑園鎮。並無湖泉閘座。查諸湖原以蓄水濟運。運河東岸如蜀山馬踏馬場獨山等湖。湖高河低。濟運甚易。運河西岸如南旺西湖昭陽南陽二湖。河高湖低。濟運稍難。雖名水櫃。常以洩運河有餘之水。而未能資運河不足之水。惟微山一湖。亦居西岸。儲水頗盈。既浮東省之漕。兼濟江南之運。再安山一湖。河高於湖。

並無泉源灌注。常形淺涸。無庸議復。其餘諸湖水發後。或現在暢流。或現在平流。俱能彼此貫注。再泉源共十七州縣。星布千有餘里。臣等親行測量。各源暢流。有踏勘所不及者。委員分路勘報。據稱無不疏通。亦有地脈遷移。泉源枯涸。共十三處。不可復浚。查雍正四年。何國宗等查明泉源共四百一十九處。本年二月。臣白鍾山親往各處督挑。計陸續浚出新泉共二十處。不至如御史馬起元所奏。泉源近多湮塞也。再馬起元所指水櫃閘壩。臣等詳勘。俱係雍正四年修建。均屬完固。至運河石閘。共四十八座。東西兩岸。斗門涵洞及滾水壩洩水橋等共六十七座。雖馬起元未經奏及。但均關運道。逐一查勘。年深月久。或宜重修。或宜補修。除白鍾山奏請估修臺莊等九閘外。其餘戴廟七級等閘。雖現在無礙宣洩。但不加修葺。恐日致坍塌。俱應修固。再六里石閘一座。臣補熙查閘面太低。恐水溢礙船。應俟補熙白鍾山另行議辦。惟各閘橋一時並修。不惟工費浩繁。而糧船回空過後。重運旋臨。爲日無多。亦難全竣。請交河撫臣等分別緩急。次第勘估興修等因。查先據馬起元奏。山東直隸兩省運河。係資泰安等十數州縣泉源。古人知諸泉緊要。所以設立廳員佐雜。不時疏浚。俾得暢流入運。又慮旱歲泉弱。於安山等湖設立水櫃。建閘啓閉。以資利濟。今年久廢弛。懇勅下河臣督撫。查覆舊日泉源。修理各處閘壩。務使蓄洩得宜。運艘無阻。奉上諭。御史馬起元奏。山東直隸兩省運河水泉近多湮塞。閘壩亦已傾圯。請飭河臣督撫。悉心籌畫。又尙書來保奏。河南衛水固濟漕運。亦灌民田。請令該撫會同總河。詳察地勢。務使漕運不患淺阻。民田亦得灌溉。著侍郎趙殿最。侍衛安寧。前往直隸。則會同總督李衛。山東則會同漕運總督補熙。巡撫法敏。總河白鍾山。河南則會同巡撫尹會一等。查勘妥議具奏。欽此。臣等查運河全賴諸泉灌注。而泉源微弱。又賴

諸湖蓄儲。是泉湖之水。涓滴皆宜籌及。今趙殿最等既經會勘。諸湖暢流。貫注泉源。四百三十九處。無不疏達。閘壩均屬完固。馬起元所奏應無庸議。至趙殿最等奏。運河石閘四十八座。東西兩岸。斗門涵洞滾水壩洩水橋六十七座。年深月久。或重修。或補修。交河撫臣等分別緩急。次第興工。查乾隆元年九月。河東總河白鍾山。以臺莊丁廟。南陽利建。邢莊阿城。荆門。梁鄉。土橋等九閘。俱係年遠。蟄裂。應行拆修。臺莊等五閘。雖有傷損。走漏無礙。啓閉尙在。可緩。惟阿城。荆門。梁鄉。土橋四閘。坍塌損過甚。必須亟修。俟糧船過完。卽行築壩興修。至臺莊丁廟等閘。或量爲修葺。或應拆修。於冬間水落。親詣細勘。奏准在案。今戴廟七級。柳林新店。師莊。棗林。萬年頓莊等閘。內有雁翅漸墊。面石裂縫。兩岸斗門涵洞。內有滿家三空橋。馬家三空橋。雁翅低陷。六里石閘。閘面太低。恐礙行船。另行酌辦。應請一并勅下漕運總督。河東總河。山東巡撫。確估。分別緩急。次第題請興修。嗣後各閘。如有脫落。皴裂。該管地方汛弁。卽詳總河。會同該撫。委員查驗。動支公項。隨時修葺。該總河於年底。取具各道廳。閘壩完固。印結咨報工部。奉硃批。依議。運河道冊。今按道殿最等。又有此次題修外。完整之處。將來備有冊脫。勅諭河臣補修。一摺。部覆已於請修戴廟七級等閘。案內議及。毋庸再議。

十月初二日。總理事務王大臣等議覆。太僕寺卿蔣漣奏。漕船雇覓絳夫。中途患病。卽擡棄河岸。率皆病重。不能行動。有與普濟堂隔遠者。有於交界地方得病。管堂胥役推諉不顧者。請勅河漕各臣。轉飭沿河閘官。及管河主簿巡檢。遇有病夫驗明。送至普濟堂。其與堂隔遠者。暫送附近庵觀。官給口糧調養。俟病痊回籍。或有極重難救者。先問姓名。死後殮埋。義塚等語。查前奉世宗憲皇帝諭旨。令各該地方。建立普

濟堂收養窮民及疾病無歸者入堂調養。今蔣漣所奏漕船緣夫患病棄置河岸卽無生理若就近送入普濟堂調養自於窮民有益應飭令沿河各官留心查察遇有此等病夫或送入普濟堂或送附近庵觀量給口糧調養務令得所運河道冊

十月十六日工部議得江南河道總督高斌疏稱宿遷桃源清河安東及高郵寶應等州縣應挑浚河道上年十月欽奉上諭著於今冬明春次第興工卽雇募民夫及時挑浚寓賑於工地方民生大有裨益欽此臣等欽遵動支河庫銀兩選委現任効力各員將應挑河道雇夫及時挑浚並委淮徐道呂維炳前署淮揚道事河庫道張師載監工督挑深通務俾地方民生均有裨益今查安東應挑舊鹽河一道動支藩庫銀兩經撫臣邵基題估所有宿遷駱馬湖尾閘之六塘河經宿遷桃源清河安東沐陽海州導流歸海但河道縣長有原未估挑並新經淤墊之處亟應疏通以資宣洩河內舊有輓木長橋爲南北要道年久朽廢每遇伏秋水發止有小船過渡騾馬車輛由水挽拽馳驛公務守候稽遲應仍建長橋以濟行人驛道查舊橋基址河寬五十六丈所費甚鉅今移於車路口官路頭地方建九孔輓石橋一座則費省工倍共估挑河築壩建橋銀六萬九千五百三十五兩五分又清口三汊引河一道上承洪湖下達清口出水因河形淺窄亟應挑寬俾湖水暢出禦黃東注庶黃無倒灌海口刷深共估挑河築壩銀四萬八千九十四兩七錢一分七釐又寶應湖內華家灘引河高郵湖內王家港引河邵伯湖內湯家絆迤下尤家窪及金灣滾壩下導水入江引河俱年久未疏湖水不暢達亟應開挑俾迅速下行俱由人字芒稻等河及董家溝歸江董家溝向有滾壩洩水因底高口窄不能暢洩上游之水而壩下通江河道又經潮沙淤墊